



**JUARA GELANGGANG SILAT:** Setelah kuda-kuda dipasang, langkah disusun dan pukulan dilepaskan, akhirnya Perguruan Sendeng Pukolan menjadi juara untuk memenangi Piala Sidek Saniff.

## Sendeng Pukolan jadi juara peraduan silat

26 JUN 1990

KUDA-KUDA dipasang, langkah dan jurus disusun diiringi dengan bunga-bunga dan pukulan dilepaskan di gelanggang peraduan silat antara balai rakyat kelmarin.

Akhirnya, jaguh-jaguh Perguruan Sendeng Pukolan dari Balai Rakyat Hougang berjaya menjadi juara keseluruhan dan memenangi Piala Sidek Saniff ke-4.

Kegigihan dan kecekapan pesilat dari Hougang itu berjaya menewaskan pesilat dari 16 balai rakyat lain dalam peraduan peringkat akhir yang dijalankan di Dewan

Sukan Bedok.

Guru silat Perguruan Sendeng Pukolan, Encik Jasni Salam, berkata: "Oleh kerana kami mendapat tempat kedua pada tahun lalu, untuk peraduan kali ini kami lipatgandakan latihan."

"Kalau dulu kami berlatih seminggu sekali, untuk peraduan ini anggota silat kami berlatih sebanyak empat kali seminggu."

Jaguh dari Balai Rakyat Kallang keluar sebagai naib johan sementara pesilat Balai Rakyat Yio Chu Kang menduduki tempat ketiga.

Setiausaha Parlimen Kanan (Pelajaran), Haji Sidek Saniff, menyampaikan hadiah kepada para pemenang.

Peraduan itu dianjurkan oleh Persatuan Rakyat (PA) dengan kerjasama Persekutuan Silat Singapura (Persisi).

Menurut Timbalan Pengerusi I, Persisi, Haji Abdul Rahim Dayan, seramai 313 peserta dari 35 balai rakyat menyertai peraduan tahun ini, bertambah sebanyak 70 peratus berbanding dengan tahun lalu.